

1 Timoteo

Pablo ishim Timoteo saludo.

1 ¹Yok Pablo. Porrosht shuu tomsaha par Jesucristo ir apóstol. Porrosht shuu Jesucristo tirēt par ishi eyok hnitewihi Porrosht ahir par uje eyok owich dechi ire ahir. Jesucristo sahmūr toy uje tomsaha par yok ir apóstol. ²Timoteo, tuu ochichew ana hutita tokosim owa. Owa shi owa itso uje pijo pork titim owa erze Porrosht ahwosni hn amsaha par ir aap. Sehe tuu eyok Deych Porrosht hn eyok Irhich Jesucristo odosir owa. Sehe tuu onuuna uje owa losuhlaap hn otakashim owa hn oduhu ehēt kiis.

Ode uje oshiyokorāha òr dekushiĩ.

³Uje ehn yahpaa titir hnimich Macedonia petikni hn titim owa par uje shi akahachi dit Efeso. Sohmiramo odechi uje otsanimirāha dekushiĩ par uje otsehn̄yēr erze oso. Tyenij atim òr par uje onoyim wir dekushiĩ. ⁴Atim òr par uje ye shi oduhu deyuwo tisir monihne, hn ye oduhu deyuwo tisir erze eyok poruwo wishi. Erze monihne hn erze eyok poruwo wishi òr ahwoso shi shuu oso òr koswāha Porrosht hn ye takashim osope par uje ma ochiraha Porrosht ahwoso par uje ma ye olotiis irpe. ⁵Nos wir Porrosht ahwoso uje oyanimirāha wir par nos shuu oso otsahmūrye. Uje oduhu daho yūhursh ich ye òr pwele onahmūryepe. Tyenij oduhu deyuwo tisir par uje òr aho kiisihiye, hn oduhu Porrosht ahwoso yakaha par uje shish ye olotiis irpe. ⁶Ode uje shi oym erze ahwoso uje ich ūru hn shi okeytkeryēhe erze ahwoso uje ye jukur par òr ire. ⁷Sehe oniyokorāha oso waa ley waa je Porrosht ishim Moiseskite, per òr ire yerij odirahapa uje oshiyokorāha oso. Uje oshiyokorāha òr ich oshuu ire itso uje ochiraha.

⁸Oyiraha uje asa ley ich ihir. Porrosht chibite asa ley par erze obiyo uje ich ihirtso, per ye ompe uje wir ochibite par obiyo kināho. ⁹Yirahalo uje ye dibite leype par erze oso uje yelij oniyokor uje mihnūwo. Chibite ley par sontew erze uje ye oniyokorpe asa uje ley tata. Chibite asa ley par sontew erze uje ye onahmūr oshiyokor uje yewo otata, hn par erze uje ye onahmūr Porroshtpe, hn par erze uje shish oshiyokor uje mihnūwo, hn

par erze uje ye otola Porroshtpe, hn par erze uje ye onahmūr oteeychāha Porrosht, hn chibite par erze uje oshuu deyo oshuu otoy, hn par erze uje oshuu date oshuu otoy, hn par erze uje oshuu oso oshuu otoy. ¹⁰ Chibite ley par sontew erze uje ye onōyhi pishye ahirpe. Shi omuhuye ahir, hn erze uje shi otorāhaye, hn chibite par sontew erze hnakirbo uje ōyhiye ahir, hn par sontew erze uje otorha oso par ōr yilo, hn par erze uje ōr kushīyo, hn sontew erze uje shi otata lekushiī otatim jwe par oshuu jwe shiyokōr uje mihnikīhi yet. Chibite ley par nos wir kuche yewo uje oshiyokōr wir uje oyuwe Porrosht ahwoso. ¹¹ Ahnūwo Porrosht ahwoso ich om hn ich om uje oso oteeychāha ire. Ishim yok par uje tanimirāha titim oso uje Jesús ishi ōr hnitewihi Porrosht ahirkite par uje ōr owich dechi ire ahir.

Pablo ninship Porrosht uje takashim ire.

¹² Tikinship eyok Irhīch Jesucristo uje ishim yok pukurbo par tanimirāha ir ahwoso. Wichi chiraha wapni uje tyenij tiyokōr om erze ir ibiyo heke ishim yok par uje tiyokōr. ¹³ Uje ehn yahpaa tomsaha par Porrosht aap ich tiyuhu pahwoso mihnuwōho Cristo, hn shish tiyokōr mihnuwōho ire pork tiyokōr mihnuwōho Porrosht aabo. Pīluuta ich mihnūpa. Per Porrosht chuuna uje yok losuhlaap hn sosir yok pork ye tikiraha uje tiyokōr hn tokotiis uje Jesús wichi uu Porrosht Ijit. ¹⁴ Eyok Irhīch Jesucristo takashim pishi yok hn ye duhu tokotiis irpe hn shuu tahmūr oso pork tomsaha par yok Porrosht aap. ¹⁵ Sehe titim owa uje ich ūru. Ich ma om uje nos oso ye olotiis erze ōr ahwoso uje sehe titim owa. Uje ehn oso shish oshiyokōr mihnūwo irmōni hn Jesucristo tirēt tīr nāhu īrmo hn ishi ōr hnitewihi Porrosht ahir. Uje ehn yahpaa tomsaha par Porrosht aapni ich tiyokōr ma mihnūwo je erze oso yewo. ¹⁶ Porrosht chuuna uje yok losuhlaap hn sosir yok par uje shuu ochiraha uje Jesucristo pwele ewenta erze uje oshiyokōr mihnūwo. Shi iyem ōr nehech terihi ishirīt nehe uje ye olotiis irpe hn ishim ōr ese ikirīt uje yelij nihna ire. ¹⁷ Sehe tuu shish oduhu Porrosht dich hn shish tyenij otola ire. Porrosht wichi uu rey uje yelij nihna ire. Shish ika. Yelij onomo. Wichi shi sohmira. Nihyok Porrosht yet. Ahnūwo ahwoso ich om par oso ochiraha.

¹⁸ Timoteo, shi owa itso uje pijo. Ele ahle titim owa uje tyenij ahakōr nehe. Erze uje titim owaka wir shi itso uje Porrosht aabo otatim owani par uje ahakōr. Kimiji ahakōr uje titim owa ich tyenij tokole om erze Porrosht ibiyo uje ishim owa par uje ahakōr. ¹⁹ Ahakōr uhu ilorz hn ye otiis Porrosht hn ye uhu ehēt yūhurash. Ode uje ye onahmūr onuuna uje oshiyokōr mīhnik nehech uhurc ich otsotiis Cristo. ²⁰ Himeneo hn Alejandro oshiyokōr oshuu itso ōr heke tokosim ōr Satanás par uje sepyēr ōr par uje tuu ochiraha uje ye ompe ochiyuhu lahwoso mihnuwōho Porrosht.

Timoteo tyenij shuu Porrosht aabo ör orar.

2 ¹Sehe tuu atim Porrosht aabo uje ör orar olapur Porrosht par erze uje oso yewo ör nesita hn tyenij onina Porrosht par takashim ör. ²Hn tyenij olak orar toy par erze ör bahluwu uje ör deyo hn par erze wimshiro toy par uje ye odihokos eyok heke shish eyok aho kiis hn eyoklo pwele yeeychähalo Porrosht hn yiyokörlo uje om. ³Uje eyok orar yuhulo itsorz ich ihirt. Porrosht sahmür uje yiyokör yuhulo itsorz. Wichí uje ishi eyok hnitewihi dahirkite. ⁴Wichí sahmür uje nos oso omasaha par ir aabo, hn sahmür uje nos ochiraha ir ahwoso uje ich üru. ⁵Shi Porrosht nohmira de. Nihyok ye Porrosht kinehëtikish. Shi ese hnakirbich Jesucristo wichí uje shuu Porrosht eheth kiisihi oso. ⁶Ishim ör ire par toy par nos ishi ör hnitew. Osdeyo uje shiyokör shuu itsorz heke nos otatim oso ir ahwoso uje Cristo ishi oso ör hnitewihi Porrosht ahir. ⁷Heke Porrosht chiihla yok par yok ir apóstol hn par tanimiráha ir ahwoso. Erze ahwoso uje titim owa ich üru. Ye tehnyër owape. Porrosht ishim yok erze obiyo par uje tiyokoráha erze oso uje ye ör israelpe par uje ye olotiis Porroshtpe hn par uje ochiraha uje ich üru. ⁸Sehe tuu nos hnakirbo uje ode lekítiyo Porrosht aabo ör eheth ör orar olapur Porrosht. Wir uje ye oniyokör mihnüwo hn ye onowähaye hn ye odihokosye par uje sehe oteye. Ich onem nahme uje ör orar pork shi ör iluu.

⁹Sehe tuu erahalo uje ich om uje tímcher uje ör Porrosht eebe otsarz ire oyáha lasuwo uje ich om par ör ire, per ye ompe uje oyáha lasuwo uje ich om shi par uje shuu hnakirbo otsahmür ire. Hn om uje tímcher otsarz dehe per ye ompe uje otsarz oshuu ire ihir pishi shi par uje shuu hnakirbo otsahmür ire. Ich om toy uje ochibite oro, kimiji otuuhna o kimiji odiyua nar o kimiji kuche yewo per ye ompe uje ochibite oshuu itsorz shi par uje shuu hnakirbo otsahmür ire. Hn om toy uje oyáha erze ör ishuwo uje ich debichpa per ye ompe uje oyáha shi par uje shuu hnakirbo otsahmür ire. ¹⁰Erze tímcher uje otata uje ör Porrosht eebe tyenij oshiyokör obiyo uje ich om par oshuu imeheeych uje ör iluu om. ¹¹Erze tímcher tyenij otër uje otsanimiráha Porrosht ahwoso hn ye odiilehet. Tyenij otola Porrosht aabo ör bahluwu. ¹²Ye ompe uje tímcharra shiyokoráha hnakirbo, hn ye ompe uje masaha par ör bahlua hn chipa hnakirbo. Shi tyenij ye diilehet ¹³pork wapkite hn Porrosht shiyokör Adán. Uje chimítkite hn shiyokör Eva. ¹⁴Satanás ye nehnyër Adankite. Shi sehnyër asa tímcharra Eva hn shuu shiyokör uje ich mihnüwo. ¹⁵Heke Porrosht sepyër tímcher hn shuu ör dospa uje ör aabosh, per shish tyenij ör aabosh, hn ör owich de Porrosht ahir kimiji ye olotiis Jesús, hn kimiji otsahmür oso yewo, hn kimiji otsahmür Porrosht hn kimiji otibey ire par uje ye oniyokör uje mihnüwo.

Yeëkpo uje om par Porrosht aabo ör bahlua.

3 ¹Ahnüwo uje sehe titim owa ich üru. Uje yeëk sehe masaha par Porrosht aabo ör bahlua, wichí sehe dishew erze obiyo uje ich

ihĩrtso. ²Heke hnakirbich uje masaha par Porrosht aabo òr bahuwa tyenij ir iluuta om par uje nĩhyok yet pwele tata uje wichi shiyokòr uje mĩhnik. Wichi shi shuu nerãhta nohmira, hn shish kemihĩ kuche. Shuu deyuwo tisir wap par uje ir ibiyo tokole om. Ich nos ochiraha uje wichi iluuta om heke otola ire. Shish tyenij sahmũr oso uje otekirihĩ ire, hn tyenij chiraha uje sanimĩrãha Porrosht ahwoso. ³Ye duhu yĩkich nẽhi ire, hn ye disdelo per shish tyenij duhu dehet kiis. Yelij dihokos oso hn ye pota hnote. ⁴Shish tibey deyso uje ode ihyuch par uje ye oniyokòr uje mĩhnik, hn tibey daabo par uje ye oniyokòr uje mĩhnũwo, hn ir aabo otola ire hn oshiyokòr uje tatim òr. ⁵Kimiji yeẽk chihĩ uje ye diraha tibey nerãhta hn daabo hn deyso uje odebuhu ihyuch, ÷ich duhu inaapo par uje tibey Porrosht aabo? ⁶Uje yeẽk hnii masaha par Porrosht aap ich ye ompe uje ochĩbite ire par òr bahuwa. Uje ochĩbite shichish kimiji ich narim ire hn shiyokòr erze uje ich mĩhnũwo shuu itso uje dyablo shiyokòrkite. ⁷Ese uje Porrosht aabo òr bahuwa tyenij ir iluuta om heke erze uje ye òr Porrosht aabo otola ire. Kimiji ye ir iluuta om ich shiyokòr uje mĩhnik hn nos ochiraha hn ochinehnm erze Porrosht aabo pork dyablo sehnỹer ire.

Yeẽkpo om par diãcono.

⁸Porrosht aabo òr bahuwo yewo uje òr iyo otsii diãcono wir hnakirbo uje òr iluu om toy, heke oso otola òr. Yelij otsehi lahwoso, hn ye oduhu yĩkich nẽhi ire. Ye ompe uje opota hnote. ⁹Ye nos oso odĩraha Porrosht ahwospe per wir ochiraha hn ye olotiispe. Uje oshiyokòr uje mĩhnũwo ich ochuuna heke onishii shichish. ¹⁰Wap tyenij oteychim erze uje sehe omasaha par diãcono kimiji òr iluu om o kimiji ye òr iluu ompe. Kimiji òr iluu om ich om par uje omasaha par diãcono. ¹¹Wir òr itspo erze timcher. Tyenij òr iluu om par uje oso otola òr. Ye ompe uje otata lare, hn ye ompe uje oshuu yĩkich sẽhi ire. Tyenij ye otsehi lahwoso. ¹²Ese hnakirbich uje sehe masaha par diãcono shi tyenij shuu nerãhta nohmira, hn tibey daabo par uje shish oshiyokòr uje om. Hn tibey toy erze uje odebuhu ir ihyuch ¹³pork erze diãcono uje oshiyokòr debiyo hn tokole om ich nos otola òr. Ye otola osope par uje otatim òr Jesucristo ir ahwoso.

Porrosht aabo wir ir ihyuch.

¹⁴Sehe titĩr owa shichish par uje tekirihĩ owa. Tichew ana hutita wap par owa. ¹⁵Kimiji ye yok pwele titĩr owa shichish ich eraha uje uhu erze Porrosht aabo oshiyokòr pork wir Porrosht ir ihyuch. Porrosht wichi ika hn ir ihyuch ye pwertpe. Wir ir aabo wichi ir ihyuch. Porrosht aabo tyenij oshuu Porrosht ahwoso imeheeych uje otsanimĩrãha otatim oso. Porrosht ahwoso ich ũru hn wir tyenij otibey. ¹⁶Ich imeheeych par eyok erze uje Porrosht shiyokòr par eyok per ye imeheeychpe par erze

yewo. Ich ihĩrtpa uje shiyokõrkite par shuu yomsaha par eyok ir aabo. Shuu Cristo taachĩhi ele irmõkite hn shuu ire shũrha. Porrosht Ichibich shuu imeheeych uje wichi uu Cristo, hn Porrosht ir anjele oteychim ire. Porrosht aabo otsanimirãha irmõho lekitiyo uje wichi uu Cristo. Oso lekitiyo ye olotiispe, hn Porrosht hnoy ire seya poõrc.

Ode uje oym Porrosht nehe.

4 ¹Esee hn Porrosht Ichibich tata shuu imeheeych uje ich yej terihi uje Porrosht sihne nãhu ĩrmo nehe hn ode uje oym Porrosht hn otsahmũr erze ichibiyo mihnũwo uje sehnũyẽr õr. Erze õr ahwoso uje otsanimirãha otatim õr wir shi tãra demonyo. ²Shi oshiyokorãha õr uje tãra erze hnakirbo uje õr aho yũhirsh hn õr kushĩyo. Ich õr ukushĩĩ yakaha õr, hn ye onuuna uje oshiyokõr. ³Erze hnakirbo sehe onontew uje õhyiye ahir. Oposo depo uje wir sehe onontew par uje ye otew. Per Porrosht shiyokõr erze oposo par uje erze uje ye olotiis ire hn ochiraha erze ir ahwoso uje ich ũru onina ire hn otew. ⁴Nos wir kuche uje Porrosht shiyokõrkite wir ich om. Nĩhyok oposo uje mihnũwo. Nos om per tyenij yina Porrosht hn yahu erze oposo, ⁵pork uje eyok ler Porrosht ahwoso hn uje eyok orar shuu oposo om.

Ahwoso uje Timoteo tyenij shiyokorãha Porrosht aabo.

⁶Titim owa. Uje ahakorãha erze Porrosht aabo uje tichew titim owa ich ahakõr om. Tyenij tokole ompa erze obiyo uje Jesucristo ishim owa par uje ahakõr. Tyenij tokole imeheeych uje eraha Porrosht ahwoso, hn ye otiis irpe, hn shish ahakõr uje Porrosht ahwoso tata. ⁷Ye ěr wir monihne pork ye jukur. Wir mihnũwo. Ye ũrpe. Uhu eluuta om par uje owa itso Porrosht ir iluuta. ⁸Ich om uje yeẽk shiyokõr nenimiyo par shuu dekiyo koota per ich ma om uje shiyokõr uje Porrosht sahmũr. Kimiji shiyokõr uje Porrosht sahmũr ich om par ire uje yesh de nãhu ĩrmo, hn ich ompo par wahacha poõrc nehe. ⁹Ahnũwo uje tichew titim owa ich ũru. Ma om kimiji oso ye olotiis. ¹⁰Heke yishew obiyo ich yiyuhu eyoklo, pork ye yotiislo Porrosht uje ĩka uje tata uje eyok owich de ire ahir. Cristo wichi uje nos ishi õr hnitewihĩ Porrosht ahir per shi erze uje ye olotiis ire wir uje otĩr ire ahir nehe.

¹¹Atim õr erze ahwoso uje titim owa hn ahakorãha õr par uje odiraha. ¹²Ye ahakõr kuche uje shuu oso otata uje shi owa hnakirbitak hn ye eraha latik. Ma om uje uhu Porrosht aabo oneẽt owa. Shish ata ahwoso uje ich om, hn ahakõr uje ich om. Ahmũr oso yewo, hn ye otiis Porrosht ahwoso, hn shish tyenij uhu eluuta om par uje Porrosht aabo oteychim owa hn oneẽt owa. ¹³Uje ehn anem yok par uje tekirihĩ owa ich shish owa ler erze Porrosht ahwoso erze oso õr ikich par uje otẽr, hn animirãha Porrosht ahwoso atim õr, hn ahakorãha õr. ¹⁴Anciano ochibite nahme

eheta eeychni par uje otsapur Porrosht par uje ishım owa akırbo par erze obiyo. Ye moym erze akırbo. ¹⁵Eyuhu owa par uje ahakōr erze obiyo par uje uhu oteychım owa uje shish ma ahakōr uje om. ¹⁶Abeyship owa par uje ye moym Porrosht hn otiis ire. Abeyship owapo par uje ahakorāha ōr uje ich ūru. Shish ahakorāha ōr. Kimiji ye moym Jesucristo hn ye moym uje ahakorāha ōr uje ich ūru ich owa owich de Porrosht ahır hn wir ōr owich de toy.

Timoteo tyenij shish shiyokōr om uje tibey Porrosht aabo.

5 ¹Titim owa par uje ye atsirāha ahwoso erze hnakırbo ilaro. Tyenij akıt ōr uhu itso uje wichi eych hn akıtpo erze hnakırbite uhu ōr ilo uje eshibo. ²Tyenij akıt erze timcher iler toy uhu ōr itso ata, hn erze pikihnin apıbite tyenij akıt ōr uhu ōr itso uje anime hn shi ahakōr uje om par uje ye wir oso ōr eyuwo dishew uje sehe ahakōr uje mīhnik.

³Erze poluu uje ye ōr iisırsh ich tyenij Porrosht aabo otakashım ōr ⁴per poluuta uje ir aabo ode o kimiji ir ahnimo ode wir tyenij ochıraha uje Porrosht ahwoso tata uje tyenij otıbey ire heke otıbey ire pork wate takashım ōrni. Porrosht sahmūr uje otakashım deysu oshuu itsorz. ⁵Porrosht aabo tyenij otakashım asa poluuta uje nıhyok ye latik chihı par uje takashım ire. Wate shish iyem Porrosht par uje takashım ire. Deeych hn dihlak wate shish orar sapur Porrosht. ⁶Per poluuta uje sahmūr ōr ahmiyo hn sahmūr hnakırbo yewo wate par Porrosht ich shi itso uje toy. Nıhyok ir ikırıt Porrosht ahır. ⁷Atım Porrosht aabo par uje otıbey erze poluu uje nıhyok ye ōr iisırsh uhu itsorz par uje nıhyok yeek pwele tata uje ōr ire oshiyokōr uje mihnūwo. ⁸Uje yeek chihı hn ye takashım deysope uje ye odebuhu ahırpe ich ye niyokōrpe uje Porrosht ahwoso tata hn ich shiyokōr uje mīhnik. Kimiji ye tibey deysope uje odebuhu ir ihyuch wichi shiyokōr uje ma mīhnik pork shish dechi ōr ahır. Oshuu imeheeych uje ōr ire otsotiis Porrosht. Wir oshiyokōr ma mihnūwo je erze yewo uje ye odıraha Porroshtpe.

⁹Ochichew erze poluu ōr iıyo uje oyuwe sesenta āyo per kal sohmıra shi shuu dabiiti sohmıra. ¹⁰Nos ochıraha uje wate shish shiyokōrni uje om, hn nishiishıp daabo, hn sahmūr uje oso otekırıhi ire. Shish takashım Porrosht aabo, hn shish takashım erze uje mihnūwo tır ōrni, hn shish sinaha ire par uje nos shiyokōr kuche uje om. ¹¹Ye atsew ebıte hutıta erze poluu ōr iıyo uje yahpaa oterıhi sesenta āyo. Wap wir ochıbite lahwoso uje tyenij oshiyokōr Cristo ibıyo. Mahn oshuu deyuwo tısır uje sehe odiilabe. ¹²Heke oym erze Cristo ir ibıyo uje ochıbite lahwosni uje tyenij oshiyokōr. ¹³Ye shi erze uje oshiyokōr. Ich uhurc otokole uje ich ōr towı hn shish otekırıhi ōr ihyuwo hn otata lare. Otokole toy uje ich otsahmūr uje odale kuche ikıyo, hn otata erze uje ye ompe per ōr ire otata. ¹⁴Heke sehe tuu akıt erze poluu uje yesh ōr apıbite par uje odii labeypo hn uje

yesh òr aabo otàra òr, hn wir otibeyship dahuwo. Kimiji wir oshiyokòr oshuu itsorz ich erze uje ye odìraha Porroshtpe ich ye òr pwelpe otata uje Porrosht aabo oshiyokòr uje mihñuwo. ¹⁵ Poluu ode uje oym Porrosht hn oshiyokòr uje Satanás sahmùr. ¹⁶ Uje yanak chihi uje wate Porrosht aap o kimiji yeèk chihi uje ire Porrosht aap hn ir ititita poluu ich tyenij tibey hn ye duhu Porrosht aabo otibey. Heke Porrosht aabo òr pwele otakashim erze poluu uje nìhyok òr iiso.

¹⁷ Erze Porrosht aabo òr bahuwo òr iyo otsii anciano. Uje otibey byen Porrosht aabo ich wir tyenij oshim òr kuche ma kihniya je erze bahuwo yewo. Erze uje òr ibiyo shi par uje otsanimiràha Porrosht ahwoso otatim òr hn oshiyokoràha òr, kimiji oshiyokòr debiyo om, heke ishim òr ma kihniya. ¹⁸ Porrosht ahwoso tata im: —Uje wey chish obiyo par shuu trigo yùhir tokole ich ye emchaha bosalt wey ahwo par uje pwele taak.— Hn tatpo im: —Hnakirbich uje chishew obiyo tyenij ir yinsirc ishi uje serz.— ¹⁹ Titim owa par uje ye èr uje yeèk tata im: —Ese Porrosht aabo òr bahlut uje iich otsii anciano shiyokòr uje mihnik,— per kimiji òr osiyer o kimiji òr tre uje otata oshuu itsorz ich om par èr. ²⁰ Uje Porrosht aabo uu òr bahlut nohmet shish shiyokòr uje mihnik ich tyenij atimihì erze Porrosht aabo òr ikich par uje iim uje shiyokòr uje mihnik par uje erze yewo otola hn ye oniyokòr uje mihnik toy. ²¹ Ana hutita uje tichew titim owa wate Porrosht sahmùr, hn Jesucristo sahmùr, hn erze ir anjele uje Porrosht chiihla òrni otsahmùr toy. Ahakòr uje de asa hutita uje tichew. Uje uhu Porrosht aabo oshiyokòr uje tichew tibite ana hutita ich ye ahakòr uhu kinaha par yet hn kinaha par ese yet. Nos uhu òr ilye. ²² Ye ebite ahme òr hu eeyo shichish par uje uhu omasaha par Porrosht aabo òr bahuwo. Tyenij uhu eyuwo tisir wap kimiji oniyokòr uje mihnik o kimiji ye oniyokòrpe par uje ye erze mihñuwo deeshi hn tìr owa. Abeyship owa par uje ye ahakòr uje mihnik. ²³ Ye shi ehe awit. Tyenij ehe wint pikaabitpo par emisht pork ehèt doso hn shish owa permo. ²⁴ Ode uje oshiyokòr mihñuwo ich nos oso ochìraha hn ochìraha uje deeych yet nehe hn tyenij oshi dabahat. Per ode uje oshiyokòr uje mihñuwo hn otsakis ire ich ye imeheeych nehech uhurc ich ochìraha. ²⁵ Shi itso erze uje oshiyokòr uje om, nos ochìraha. Per ode uje yelij onomo òr uje oshiyokòr uje om heke je deeych yet nehe hn ochìraha.

Timoteo tyenij sakit Porrosht aabo uje òr yilo.

6 ¹ Titim owa. Erze Porrosht aabo uje òr yilo tyenij otola nensiro par uje ye wir oso oninehnm Porrosht hn par uje ye oninehnm erze ahwoso uje yiyokoràha òr. ² Uje òr yinsiro ode uje wir Porrosht aabo toy ye ompe uje ye otola òr shi pork wir Porrosht aabo toy. Tyenij otola òr ma. Ich ma om uje oshiyokòr òr ibiyo ich oshuu ihàrtso pork wir òr leshìbo. Porrosht sahmùr òr toy. Ahnùwo pahwoso uje tichew titim owaka wir uje tyenij ahakoràha òr hn uhu oshiyokòr.

Oso ode uje otsanimirāha dekushiī.

³Titim owa uje yeēk chihi uje sanimirāha ahwoso uje ye ūrpe, hn ye nahmūrpe erze ahwoso uje eyok ĩrhīch Jesucristo shiyokorāha oso uje shuu oso oshiyokōr uje Porrosht sahmūr. ⁴Wichi shi sehe duhu ire ma dich je erze leshibo. Ye diraha latik. Wichi shi sahmūr uje shiyokos oso. ĩr ahwoso shi shuu oso opota ire, hn shish shuu oso oshiyokosye, hn ochinehnimye, hn shuu ōr pyensa uje erze yewo oshiyokōr uje mīhnūwo. ⁵Erze hnakirbo uje otsanimirāha ahwoso uje ye ūrpe hn erze hnakirbo uje ōr eyuwo mīhnūwo shish oteye hn ochikey uje Porrosht ahwoso ich ūru. Wir ōr eyuwo pyensa uje oteychāha Porrosht shi par uje otserz hnote. ⁶Ich ūru. Erze uje oteychāha Porrosht hn ich ōr aho kiis ich ma om par ōr ire. ⁷Uje eyok shurēhe nāhu irmōni ichii ye kuche chihi eyok ahirpe, hn uje yiti ich ye eyok pwele yukwii eyok kushjārope. ⁸Kimiji eyok poso de uje yahu hn eyok ishuwo de uje par yonāha ich om. Yuhu eyok aho kiis. ⁹Erze uje sehe oduhu ire ĩhīr deyo ich shish kuche kihniya tīr ōr par uje sehe duhu oniyokōr uje mīhnūwo. Wir ōr eyuwo shi itso trampta uje dechi par chishew ōr. Shuu oshiyokōr itso uje ye ōr eyuwīrsh. Shuu oshiyokōr erze uje ye ompe par ōr ire. Ye duhu ōr kushjāro jukur nehech uhurc erze mīhnūwo uje oshiyokōr ich sihna ōr ire. ¹⁰Shi otsihna ire pork nos wir oso uje opota hnote ich ochibīte ire par uje oshiyokōr nos wir kuche mīhnūwo. Oso ode uje opota hnote oshuu itsorz nehech uhurc ich oym Porrosht hn ich ōr dosdarakpa.

Timoteo tyenij shiyokōr Porrosht ibiyo.

¹¹Timoteo, owa shish eeychāha Porrosht. Aham nos wir kuche uje ich mīhnūwo hn ahakōr uje Porrosht sahmūr. Eeychāha ire hn shish ye otiis ire. Ahmūr Porrosht aabo toy. Owa ewenta erze mīhnūwo uje oso oshiyokorīhi owa. Ye uhu ehēt duhlu. ¹²Uhu owa duurapo par ahakōr erze obiyo uje Porrosht ishīm owa pork owa ye otiis Jesucristope. Porrosht chiihla owa par uje ishīm owa ese ĩkirīt uje yelij nihna ire. Abeyship owa par uje ye moym ese ĩkirīt. Uje atim erze oso erze ahwoso om uhu itsorzni on: —Ye tokotiis Jesuspe,— heke imeheeych uje Porrosht chiihla owani par uje ishīm owa ese ĩkirīt. ¹³Porrosht sahmūr uje titim owa uje wichi uje nos ishīm kuche ĩkirīt hn Jesucristo sahmūr toy uje titim owa. Wichi uje tata lahwoso omoho Poncio Pilato ĩle ĩkich. Titim owa par uje ¹⁴ahakōr erze uje tichew hn ye eymehiī par uje nīhyok yet pwele tata uje ahakōr mīhnik nehech terīhi uje eyok ĩrhīch Jesucristo cheeshpo nehe. ¹⁵Porrosht chibīte Cristo ishīrīt par uje cheeshpo nehe. Porrosht wichi uje yeeychāhalo hn nīhyok uje itso ire. Wichi uje shuu ōr aho kiis. Wichi uu rey ōr bahlut pisht hn wichi uu ĩrhē ōr bahlut pisht. ¹⁶Wichi shi sohmīra uje shish ĩka hn debuhu luu ehēt. Nīhyok yeēk pwele

tĩr asa luu pork yokõrt jwertpa. Ye latik chihi uje umo irni, hn ye latik pwele nomo ire. Sehe shish tuu oso otola ire hn oduhu ire dich. Ich om oshuu itsorz.

¹⁷Titim owa par uje atim erze Porrosht aabo uje ode lika hnimich uje õr ihĩr deyo par uje ye onarim ire. Hn ye ompe uje erze ihĩr deyo õr aho otsii: —Õryok hnote de ich kihniya. Oyiyokõr uje oyahmũr. Ye nesit yeẽk takashim õryok.— Ye ompe uje onarim ire shi pork õr hnote de. Erze õr hnote ich pwele sihna ire shichish. Atim erze ihĩr deyo uje ich ma om uje shi ye olotiis Porrosht. Wichi nos ishim eyok kuche ich kihniya par uje shuu eyok aho kiis. ¹⁸Atim õr par uje shish oniyokõr uje om. Shish tyenij oniyokõr debiyo ich kihniya uje om par erze yewo. Ye ompe uje otsarhak lasujãro. Shish tyenij ochimit ire par uje otakashim õr uje kuche nihyokĩhi õr ahir. ¹⁹Uje oniyokõr oduhu ilorz ich itso uje ochihmer õr kushjãro wahacha Porrosht ahir ich kihniya par ese õr ikirĩt uje de Porrosht ahir uje ich ihĩrtpa.

²⁰Timoteo, tyenij ahakõr uhu om erze obiyo uje Porrosht ishim owa. Ye ãr erze õr ahwoso uje ye jukur. Ye tãra Porroshtpe. Hn ye ãr erze uje otsotiis Porrosht ahwoso hn otata oshuu kinaha. Wir ochibite uje ochirahapa uje ich ũru per ye odirehepe. ²¹Ode uje ye olotiis Porroshtpe per uje otẽr erze õr ahwoso kinãho ich otsahmũr, heke ich uhurc ich otsotiis Porrosht. Sehe tuu Porrosht dosir olak.